

BATAKURU PETRUUSU ARANURU NDUN

1 ¹ Immorde e an min Petruusu, *sahaabaajo Iisaa Almasiihu on, haa e bee subaabé Alla, tujankeebe e oo aduna, e nder dee leyde Pontii e Galaasi e Kapadoosi e *Aazii e Bitinii. ² Ko onon yo subiranoobe ebboore Alla, on Ben men, e dow *labbinireede Ruuhu makko on, fii doftagol Iisaa Almasiihu on, wiccee yíiyán^a makko dan: yo moyyere e buttu sowindirane on.

Fii Tama'u Selludo on

³ Mantoore wonanii Alla, Ben Iisaa Almasiihu Joomi men on. Ko yurmeende makko mawnde nden o yediri en jibintineede sabu immintineede Iisaa Almasiihu on e hakkunde maybe ben fii no hebiren tama'u selludo, ⁴ e fii no hebiren ndondi ndi bontataa, ndi tuunataa, ndi mbaadi mun waylotaako, maraniindi on ka kammu, ⁵ dun ko onon bee be Alla hiwiri bawgal mun sabu gomdinal ngal fii kisiyee hebuliido fejn-nineede on ka saa'iiji sakkitori.

⁶ Kodun wonani on ndee weltaare tiidunde, hay si tawii fewndo doo maa satteendeeji seeda wona ko aanini on, ⁷ fii no gomdinal mon ngal ndarndoree. Gomdinal mon ngal-le no buri kanjje hittude, bay kanjje ko ko mulata, den-le ko yiite ndarndoraa. Ko nii gomdinal mon ngal wonirta maniniingal, darjingal, e teddungal jnande Iisaa Almasiihu on feenitoyi. ⁸ On yidii mo kanko Iisaa e hoore on yi'aali mo, on hoolike mo kadi e baawo yi'ugol mo. E hoore dun, hidon hebbinori weltaare tiidunde, nde wonkii woo waawataa sifaade fii mun, ⁹ bay hidon hendaade faandaare gomdinal mon ngal, dun ko kisiyee wonkiji mon din.

¹⁰ Oo kisiyee ko huunde nde annabaabeben dabbatunoo tefi fii mun, dun ko bee *hiitinoobe fii oo sulfu suitiido on. ¹¹ Hibe dabbaynoo andugol ko e saa'i hombo maa ko honno ko Ruuhu *Almasiihu on andini be kon wadiroyta, fewndo on

^a1.2 «Wiccegol yíiyán Almasiihu on» no firi «labbiniregol yíiyán makko dan.»

Ruuuhu wondo e mabbe hiitantonoo ɓe fii tampereeji heboyaynoodi Almasiihu on din e darjaaji hikkotoodi e mun din.¹² Be banginanaa kadi wonde, wonaa fii mabbe kambe tigi ɓe wonnoo kurkanaade, kono ko fii mon, fewndo ɓe wowli fii dii piiji di ɓee waajiiɓe on fii Kibaaru Moyy়o on yottiniri e mon fewndo doo *Ruuuhu Seniido iwrudo ka kammu on, din piiji di tawata hay malaa'ikaabe ɓen tigi no faalaa andude fii mun.

Noddaandu fii Wonugol Laabube

¹³ Kodun si mi wi'ay on, hebulinee hakkillaaji mon din, waawon hoore mon, wadon tama'u mon on fow e oo sulfu mo yedoytedon jnande Iisaa Almasiihu on feejitoyi.¹⁴ Wa'ee wa paykoy doftiikoy, hara on accaali hande kadi diya himmeeji ardoon, dun ko din di wondunodon e nder angal andugol mon.¹⁵ Kono bay Noddudo on on ko Laabudo, onon kadi wonee laabube e nder jikku mon on,¹⁶ ko fii e hino ko Allaahu on daali kon ka deftere: «Wonee laabube, ko fii ko mi Laabudo.»^b

¹⁷ Bay on noddirii oo Fonnudo fow «Baaba», dun ko on Naawiroowo mo bee embere kuude mun den, haray yo on hulu mo fannin hidon kodii aduna on.

¹⁸ Hidon andi wonaa huunde bonaynde wano kaalisi maa karjye sottiradon e nder dan ngurndan meerejan dan ronunodon baabiraabe mon ɓen,¹⁹ kono ko yiyan Almasiihu hittudan dan, on wa'itaydo wa baalun kun alaa ella, alaa waadere,²⁰ on adaado toddeede ado fuddoode aduna on, kono o fejninaa ka saa'iiji sakkitori fii mon.²¹ Ko sabu on gomdinirdon Alla, on Immintindo mo e hakkunde maybe ɓen, yedi mo kadi mangural, fii no gomdinil mon ngal e tama'u mon on fawora e Alla.

²² Bay on labbinirii hoore mon doftagol goonga on, haa on hebii giggol siddankaaku sellungol, jooni yidsindiree giggol tiidungol ka berde mon,²³ dun ko

^b1.16 Lew. 19.2

onon bee jibinaabe kesun, be tawata hinaa awdi muloori kono ko luttoori, immorde e daaluyee Alla wuurudo tabiti on.²⁴ E hin-le:

«Kala neddo no wa'i wa hudo,
darja makko on fow kadi
no wa'i wa piindi kon hudo.
Hudo kon no yooriri, piindi ndin no saamude,
²⁵ kono daaluyee Joomiraado on
ko luttayso haa poomaa.»^c

On daaluyee ko Kibaaru Moyyó mo fejjinanadon on.

2 ¹Awa tertee kala bonki e kala kippugu e faasiqiyaagal e nawliigu e kala joore, ²yidiron daaluyee on wano booboo kecco yidiri biraadan kencan laabudan, fii no mawniron e nder kisiyee on sabu makko,³ bay on mettike, on andii Joomi on no moyyi.

Fii Hayre nden ka Sobbundu e Jamaa Subaado on

⁴Badee mo kanko ndee hayre w提醒 unde, nde yimbe ben bugitinoo, dun ko on mo Alla subii, hittudo yeeso makko. ⁵Bay onon kadi hidon wa'i wa kaaye uuруде mahindiraade, woni suudu ndu Ruuhu Alla on hodí e mun, fii wonugol *yottinoobe sadaka laabube fii no wadiranon Alla sadakaaji ruuhuyankeejí, hara ko no hawrirani mo, rewrude e Iisaa Almasiihu on. ⁶E hin-le no windii wondema:

«Mido tippinde ka hoore Fello *Siyuuna
hayre wonaynde ka sobbundu,
dun-le ko nden subaande hittunde.
Kala gomfindo e makko hersinoytaake.»^d

⁷Nden hayre no hittani on, onon bee gomdinbe. Kono fii be gomdinaa ben:

^c1.25 Isa. 40.6-8

^d2.6 Isa. 28.16

«Hayre nde mahoobe ben hawkunoo nden
wontii hittunde ka sobbundu,^d
⁸hayre fegginaynde,
e fetere libaynde.»^e

Be fegike e mayre sabu yeddugol mabbe daaluyee on, tawde kodun be muuyananoo.

⁹Kono onon, ko on lejol subaangol, yottinoobe sadaka fii *laamu Alla ngun, awa kadi ko on jamaa laabudo, yimbe jeyaabe ka Alla fii ko fejjina kuude moyye mawde on Noddudo on fii yo on yaltu ka niwre, aron ka ndaygu makko hawniingu. ¹⁰Dun ko onon bee be tawata hari hinaa jamaa Alla, kono jooni ko on jamaa makko, dun ko onon bee be hebaano yurmeende makko nden, kono jooni on hebii yurmeende makko nden.

¹¹Ko onon, yo yibbe, hobbe jananbe, mi wakkilinii on e reenagol dii himmeeji neddanke, di tawata ko habooji wonkii. ¹²Wuuriree no moyiri e hakkunde be gomdinaa ben fii nde hibe toopira on wa wadoobe ko boni, yo be yi'u kuude mon moyye den, dun be mawninoyay Alla nde o aroyi.

Fii Yankinanagol Lambe ben

¹³Sabu Joomiraado on, yankinanee kala laamu neddanke, woni lando mawdo, mardo mbawdi, ¹⁴woni ben be o lammini fii donkingol ben wadoobe ko boni, manta ben wadoobe ko moyyi. ¹⁵Awa, ko Alla faalaa e nder ko wadoton ko moyyi kon, ko yo dun dahu tankina majjube be alaa hakkil ben. ¹⁶Wuuriree wa rindinaabe, e baawo wadugol ngun ndimu wirngallo buumayngo bonki, kono wa kurkantoobe Alla. ¹⁷Teddinee fow, yidon musibbe gomdinbe ben, hulon Alla, teddinon lando on.

^d2.7 Zab. 118.22

^e2.8 Isa. 8.14

¹⁸Jiyaabe, yankinanee jeybe on ben e nder teddungal timmungal, hara hinaa non moyube ben tun e newiibe ben, kono e mettuge fii ben kadi, ¹⁹ko fii, si e nder muijtagol fii Alla, ontigi najjike tampere nde ontigi fodaa, dun ko huunde moyfere. ²⁰Ko hongal e teddungal mardon, si on mujjike tampere sabu wadugol junuubu? Kono si on mujjike tampere sabu wadugol ko moyfi, dun ko huunde moyfere yeeso Alla. ²¹Awa, ko fii dun noddiradon, ko fii *Almasiihu on kadi tampii fii mon, o accanii on misal, fii no jokkiron batteeji makko din, ²²dun ko on «mo wadaali junuubu, mo toni mun jantaaki fenaande»,^{f23} dun ko on hoynaado mo yottaaki, tampinaado mo kambaali, kono watti fow e juude on Naawoowo no feewiri non. ²⁴O ronditanike en junuubaaji men din ka bandu makko, dun ko ka *leggal altindiraangal, fii no maayiren e telen-ma junuubaaji din, wuuren ngurndan feewudan, ko fii, ko sabu barmeeji makko din selliniradon. ²⁵Bay hari hidon wa'i wa baali saakitaadi, kono jooni on artiraama ka Ngaynaako, Hiwoowo wonkiji mon din.

Fii no Yettindirbe Haani Wondirde

3 ¹Onon kadi yo rewbe wano non, mo kala e mon yo yankinano moodi mun. Dun si wobbe e mabbe doftaaki daaluyee on, be gomdiniray sabu kuude rewbe mabbe ben e baawo kongol, ²e nder yi'ugol mabbe jikku mon laabudo wondudo e teddungal on. ³Wota on fotin ko woni e kene kon, wano mooragol e cudorgol kajje e conci dimi. ⁴Kono yo njari mon kin wonu ko marii ka bernde, hara ko njari halal ki bonataa, ki jikku newiido deeyudo. Kodun buri hittude yeoso Alla. ⁵Ko nii rewbe baawo doo laabube, tanyinornoobe Alla ben, parornoo, be yankinanii moodibbe mabbe ben, ⁶wano Saarata non, on doftinoodo Ibraahiima, wi'aynoondo mo koohoojo makko. Onon kadi on laatoto jiwbe Saarata si on wadii ko moyfi, e baawo on jabude jiibileede kulol woo. ⁷Onon moodibbe ben kadi wano non, mo

^f2.22 Isa. 53.9

kala e mon yo wondir e sonnaajo mun on e hoore andugol wonde rewþe þen ko
þe nedðanke burþe lo'ude. Teddiniron þe wa ronidoobe e mon ngurndan dan Alla
yedi on dan, fii wota hay huunde hadu torndeeji mon din.

Fii Tampangol ko Moyýi

⁸ Ka rawnoode, on fow hebee mijjo wooto e giggol gootol, heewon giggol
siddankaaku e yurmeende e angal mawnintinaare.⁹ Wota bone woo yottore bone,
maa yennee yottoo, kono ka liddu dun, onon ko yo on du'ano, ko fii ko dun
noddiradon fii no roniron barki kin.¹⁰ Ko fii:

«Si tawii godðo no faalaa wuurude ngurndan weldan,
e yi'ugol þalaade hettaare,
haray yo ontigi reenu ðenngal mun ngal
e wowlugol ko boni,
o reena toni makko din e janfagol.

¹¹ Yo ontigi wodðito ko boni, o wada ko moyýi,

odaððita buttu on, o jokka dun,

¹² ko fii giide Joomiraado on no e hoore feewube þen,

awa kadi noppi makko din no udditanii toraaje maðþe den,

kono yeeso Joomiraado on

no huccana þen wadoobe bone.»^g

¹³ Ko hombo tampinta on, si on himmanii wadugol ko moyýi? ¹⁴ Dun-le wuren hay
si on tampii fii peewal ngal, on maloyte. Awa wota on hulu yimþe þen, wota on
laato maapiiþe.¹⁵ Hormoree *Almasiihu on ka berde mon wa Joomi on. Wonee
þnande woo hebuliþe fii jaabagol landotoobe on dalil tama'u mon on þen.

¹⁶ Wadiron dun newaare e teddungal e nder bernde mon laabunde nden, fii yo
wonþe on wowlude ko boni e hoore jikku mon moyyo on e telen-ma Almasiihu

^g3.12 Zab. 34.13-17

on, heboy ko hersinta 6e e fee kongudi mabbe din.¹⁷ Awa kadi, koburi ko tampugol sabu wadugol ko moyyi, si tawii dun ko faale Alla, edii tampugol sabu wadugol ko boni.¹⁸ E hin-le Almasiihu on kadi maayii fii junuubaaji din nde wootere ko yoni haa poomaa, on Feewudo fii 6e feewaa 6en, fii addugol on e Alla. O waraama ka bandu, o wurnitiraama Ruuhu Allaahu on.¹⁹ Ko on Ruuhu o yaari, o waajoyii ruuhuji wonbe ka kaso 6en,²⁰ dun ko bee murtunoobe wa fewndo tawata mujal Alla ngal no beydii ka jalaade de Nuuhu moyyinaynoo laana kan e mun. Ko yimbe seedaabe nii, e maanaa be njeetato, be dandiraa rewugol ka ndiyan.²¹ Dun ko misal *lootagol maande kisiyee wonadon dandireede fewndo doo. Dun wonaa lootugol tuundi bandu ndun, kono ko aadanorgol Alla bernde laabunde. Dun hisiniri on immintineede Iisaa Almasiihu on,²² on Yentudo ka kammu, wonirdo ka sengo jaamo Alla, on mo malaa'ikaabe 6en e bawde den e doole den yankinanaa.

Fii Wuurugol no Alla Yidiri non

4 ¹ Bay *Almasiihu on tampii ka bandu mun, onon kadi dolnoree e ngon mijo wooto, (ko fii on tampudo e bandu seedii e faale wadugol junuubu),² fii no wuuron wano Alla faaliraa non, hara hinaa e himmeeji neddanke, yeru saa'i heddaniido on wuurdugol e bandu on.³ Awa e saa'i feyyunoodo on, on booyii wadude kobe gomdinaa ben yidi wadude kon, fewndo jokkondirdon e mabbe e nder jiibaare e himmeeji bondi e mandilugol e *fasaadu e mottondirgol ka mandilettee e dewal sanamuji harmungal.⁴ Kono jooni be tawi no yaldini be ko on alaa jokkondirde e mabbe hande kadi e telen-ma nden boylaare tiidunde kon. Kodun wadi si hibe hoynude on.⁵ Awa be hunitoyto yeoso on Hebulaniido jaawugol wurbe e maybe.⁶ Kodun wadi si hay maybe ben fejjinanaa Kibaaru Moyyo on, fii nde be jaawiroyaa wa neddanke ka bandu, yo be wuuroy ka ruuhu wano Alla wuuri non.

⁷ Lannoode piiji din fow hewtii. Awa wonee hakkilanbe waawon hoore mon fii no waawiron tororde. ⁸ Ko adii kon, yidindiree giggol tabitungol, ko fii giggol ngol no monta adadu junuubaaji ujune ujune. ⁹ Tolnindiree e baawo dukindirgol. ¹⁰ Awa yo mo kala e mon kurkoran heddiibe ben dokkal ngal o hebi ngal, dun on wonay halfinaabe moyfere Alla yaajunde nden. ¹¹ Yo taw non, mo yewtay e hakkunde mon, ko daaluyeeji Alla din o woni yewtirde. Mo kirkoto kadi e hakkunde mon yo taw ko mbawdi ndi Allaahu on okki mo ndin woni ko o kurkori. Dun fow ko fii yo mantoore wonan Alla, e innde Iisaa Almasiihu on, on mo mangural e bawgal wonani haa pooma. Aamiina!

Fii no Almasiiyaajo Haani Wakkilorde Tampereeji din

¹² Ko onon, yo yibbe, wota on yaldir nguli hebuki on kin fii ndarndegol, wa si tawii ko huunde heyre hebi on. ¹³ Kono weltoree tawdeede e tampereeji Almasiihu on din, fii no hebiroyon kadi weltaare jnande feenugol mangu makko ngun. ¹⁴ Si on hoynaama fii innde Almasiihu on, haray ko on malaabe, ko fii Ruuhu darjindo on, dun ko on Ruuhu Alla, no e hoore mon. ¹⁵ Si goddo e mon tampinaama, wonaa yo taw ko fii himo itti hoore, maa himo wujji, maa himo wadi ko boni, maa himo ukkii e ko wonaa haaju makko. ¹⁶ Kono si tawii o tampinaama sabu ko mo Almasiihu on, haray wota ontigi hersir dun, kono yo o mawnin Alla sabu nden innde.

¹⁷ Jooni non, saa'i fuddoode jaawoore nden hewtii, nde fuddora yimbe Alla ben. Si tawii ko enen nde fuddori, haray ko honno sakkitoode ben be doftanooki Kibaaru Moyfo Alla on wa'oyta? ¹⁸ Si tawii non feewudo on dandiraama karahan, haray ko honno woniranta mo rewataa Alla on e junuubankeejo on? ¹⁹ Dun haray, yo wonbe tampude no yaadiri e kodduruyee Alla on duumo e wadugol ko moyfi, be wattu wonkiji mabbe din e juude Tagudo on, dun ko on Sella-Findeejo.

Fii no Petruusu Waajori Ardotoobe ben e Sukaabe ben

5 ¹Awa jooni mido yewtude ardotoobe *moftal wonbe hakkunde monben. Min kadi ko mi ardotoodo, e seedeejo tampereeji *Almasiihu on, e heboowo gebal e darja fejjinoyteedo on. Mi wakkilinii on ²aynugol wuro ngo Alla halfini on ngon, hara hinaa e hoore karheede, kono hara ko no Alla yidiri non e hoore bernde laabunde, hara on wadiraali dun miile, kono hara ko e anniye moyyo. ³Wota on hollu mbawdi e hoore be halfinadon ben, kono wonanon wuro ngon misal.⁴Dun, nde Hooreejo Ngaynaakoobe ben feenoyi, on hendoyto *meetelol darja, ngol ijari mun bontataa haa poomaa.

⁵ Onon kadi sukaabe wano non, yankinanee ardotoobe moftal ngal, mo kala e mon jippina hoore mun yeeso oya, ko fii:

«Alla liddoto mawnintiniibe ben,

kono o yeda jippinbe hoore mun ben sulfu.»^h

⁶ Awa, jippinee hoore mon e ley jungo Alla dolnungs ngon fii yo o bantoy on e saa'i mo o toddii on. ⁷Fawee anndeeji mondin fow e hoore makko, ko fii o kippay fii mon.

⁸ Wonon hakkilanbe e reeniibe, ko fii liddotoodo on on, dun ko Ibiliisa, no wadude yaha ara, riggora wa ngayuuri, hara no dabba ko seekita. ⁹Dartoree mo kanko Ibiliisa no tiidiri e nder gomdinal ngal, e hoore yo on andu ko tampereeji gooti fawadon onon e musibbe mon wonbe e nder aduna on fow. ¹⁰Kono si on tampii e nder saa'ihun nii, Alla Jom sulfu on, on Noddudo on ka darja makko poomayankeejo on e nder humondiral e Iisaa Almasiihu on, o heydintinoyay on kanko tigi, o tabintina on, o tiidinoya on, o wada on be dillintaako. ¹¹Ko kanko bawgal wonani haa poomaa. Aamiina!

^h5.5 Tin. 3.34

Fii Waynitannde Petruusu nden

¹² Ko e dow ballal Silaasi, oo musiddo sella-findeejo, mi windirani on nduu batakuru rabbidundu, fii wakkilingol on e fii seedintingol wonde ko dundoo woni moyyere Alla haqiqaare nden, awa humee e mayre. ¹³ Subaabé wonbe *Baabiilaⁱben e Markuusa biddo an on salminii on.¹⁴ Awa hiwrondiree lunnondiral giggol siddankaaku.

Yo buttu wonan on, onon humondirbe e Almasiihu on ben fow.

PREMIÈRE ÉPÎTRE DE PIERRE
en Langue Pular (Fouta-Jalon)
République de Guinée
© 2013 Traducteurs Pionniers de la Bible
en collaboration avec
Mission Protestante Réformée

ⁱ5.13 No sikkaa wonde oo «Baabiila» mo o wowli fii mun doo, ko Roomu. Fej.
17.18